

13 JAN 2003

Dadah-Wanita

5,000 WANITA SERTAI KOLOKSIUM ANTI-DADAH TERBESAR

KUALA LUMPUR, 13 Jan (Bernama) -- Seramai 5,000 wanita akan menyertai kolokium anti-dadah terbesar pernah diadakan di negara ini yang memberi fokus terhadap penglibatan kaum wanita dalam usaha membanteras penyalahgunaan dadah yang masih lagi menjadi satu daripada masalah utama negara.

Kolokium tiga hari itu, yang akan diadakan di Pusat Konvensyen Antarabangsa Genting di Genting Highlands mulai Jumaat ini, bertujuan memberi kesedaran, menyebarkan maklumat dan menyemai rasa insaf di kalangan setiap wanita Malaysia betapa serius dan buruknya penyalahgunaan dadah serta bahaya penyakit AIDS kepada diri sendiri, keluarga dan masyarakat sekiling.

Pengerusi Biro Hal Ehwal Wanita Persatuan Mencegah Salahguna Dadah Malaysia (Pemadam) Datin Paduka Rakibah Abdul Manap berkata walaupun sebahagian besar daripada penagih dadah di negara ini adalah kaum lelaki, usaha anti-dadah di kalangan wanita amat penting bersesuaian dengan peranan mereka sebagai seorang pengasih, penyayang, pengasuh, motivator dan fasilitator di dalam institusi keluarga dan masyarakat.

Peserta yang paling ramai adalah dari kalangan 1,000 pelajar perempuan sekolah menengah dan 1,000 guru kaunselor di setiap sekolah menengah di negara ini, katanya kepada Bernama.

Kolokium itu, yang akan dicatat dalam "Malaysia Book of Records" sebagai yang terbesar pernah diadakan bersabit dengan masalah penyalahgunaan dadah, akan dirasmikan oleh isteri Perdana Menteri Datin Seri Dr Siti Hasmah Mohamed Ali, manakala Perdana Menteri Datuk Seri Dr Mahathir Mohamad akan menutupnya pada Ahad ini.

Rakibah berkata kolokium itu juga bertujuan memaksimumkan penglibatan kaum wanita dalam usaha menyampaikan maklumat dan ilmu berkaitan langkah-langkah pencegahan dadah kepada kaum keluarga, sahabat handai dan masyarakat.

Satu pameran anti-dadah yang bertemakan "Hikmat Kasih Sayang" akan diadakan sempena kolokium itu yang merangkumi empat aspek utama -- keluarga bebas dadah, sekolah bebas dadah, tempat kerja bebas dadah dan masyarakat bebas dadah.

"Ini selaras dengan matlamat kerajaan untuk menjadikan Malaysia negara bebas dadah menjelang tahun 2015," kata Rakibah.

Menurut statistik terkini, seramai 26,799 penagih dadah dikesan dari Januari hingga November tahun lepas di seluruh negara, yang terdiri daripada 13,935 atau 52 peratus penagih baru dan 12,862 atau 48 peratus penagih berulang.

Rakibah berkata penglibatan kaum wanita dalam penyalahgunaan dadah hanya 1.28 peratus berbanding kaum lelaki 98.72 peratus.

"Namun fenomena ini harus dibendung dan sentiasa diawasi agar jumlahnya tidak meningkat setiap tahun." katanya.

-- BERNAMA

AU AU RON